

**Ọkwukwo izi Pọlu
gbaznennu
Ele Rom**

Nhne gbasiri ọkwukwo izi ka

Ọkwukwo izi Pọlu gbaznennu ele Rom bụ ma be jikn-
ernu ọ nabnanya Pọlu nụ Rom. Echiche a bụ ma
ọ rny ọnu n'esilawuru be ige matị, hite n'oyi aka
be, o zne Sipeni. Ọkwukwo izi ele Rom neegesi kpa
Chiokike nọgwnu ele badnụ ele ikpe mána, mee ya
nụ be ziri n'udno. Chiokike mernu ele badnụ nụ a
ziri n'udno hite n'ọkwnata mkpọma ke zị nụ Jizọsi
Karaịsi. Nye Karaịsi ọbula nwernu udno kwnornu
nụ Chiokike mernu badnụ nwernu ọhni a, whọga
nụ rikne ke mmehie nụ ọnwu. Pọlu kwuru nụ ele
Ju nụ ele búo ele Ju nwernu igwe n'oru Chiokike
hite nụ Jizọsi Karaịsi.

Nhne zị n'ọkwukwo ka

Ọpanizo (1:1-17)

Ọznohia hite nụ mmehie zị mkpa (1:18---3:20)

Apna Chiokike kwnornu ọznohia (3:21---4:25)

Budnu ikne nụ rime Karaịsi (5:1---8:39)

Izireli zị nụ mmụma Chiokike (9:1---11:36)

Agwa nye Karaịsi (12:1---15:13)

Ọkwukwo nụ obekwu ikwu (15:14---16:27)

¹ Mawa Pọlu, nye izi Karaịsi Jizọsi, nye Chiokike
sukwuru, ma m bụru m nye izi Jizọsi, họhia masị a
ma m bụru m nye zni izi ọma a, naagba ọkwukwo izi
ka.

² Ka bụ izi ọma Chiokike kweru mkwna ogologo ige wheru ewhe hite n'ọnu ele ọwhnurninya, lele kpa be gbarụ a n'ọkwukwo nsọ.

³ Izi ọma ka gbasiri Nnwọ a, Nyenwe aị Jizọsi Karaịsi, nye ghoru badnụ, be mụ a n'avnurnu Devidi.

⁴ Chiokike gesiri nụ Jizọsi Karaịsi bụ Nnwọ a, nga o mernu o hi n'ẹnwu lizọ hite nụ rikne ke Enine Nsọ.

⁵ Hite n'aka a, Chiokike nyernu aị oru ọ bụru ele izi kwnornu Karaịsi, ma a sukwu kpakara mba ma be kweru nụ ya, bno a masị nsị.

⁶ Kpakara anụ ele zị nụ Rom, zị n'esilawuru ele Chiokike sukwuru ma be bụru ke Jizọsi Karaịsi.

⁷ M naagbanụ anụ ele zị nụ Rom ọkwukwo, ele Chiokike whnurnu n'anya, sukwu ma be bụru ele ke a,

Oru nụ udno ke Chiokike Nda aị nụ Nyenwe aị Jizọsi Karaịsi dazinu anụ.

Okpukpe ọtu mmamma

⁸ Ke mbom, m nọtunu Chiokike mmamma hite nụ Jizọsi Karaịsi kwnornu anụ, nụ ọkwnata mkpoma anụ gazuru ọwa.

⁹ Chiokike, nye me ji kpakara mkpoma m naakwanụ, hite n'okpo okwo izi ọma Nnwọ a, bụ nye akebne m, nụ m neechenwanya anụ ige ọbula.

¹⁰ Ige ọbula me neekpe okpukpe, m nọrio Chiokike ma hite n'echiche ọma a, o nyee m oghere me va lekasi anụ.

¹¹ Kwnornu nụ m pioru m ọ whnụ anụ anya ma me nụ anụ kerị ngozi ke enine, ke jeeme anụ gwuzosi rikne.

¹² Ke bụ me va, a kasirita ẹhni aị ovu, ọkwnata ovu m jaakasi anụ ovu, ọkwnata anụ jaakasi m ovu.

¹³ Rụmu nda m, m pioru anụ mahia nụ agida ige, m pioru m ọ va lekasi anụ, kovu m nwée m rikne dụ kịtna. M pioru m o rihia mkpuru ovu n'esilawuru anụ lele kpa me rihiaru mkpuru ovu n'esilawuru ele búo ele Ju.

¹⁴ Kwnornu nụ m ji m kpakara ele badnụ ọgwo ọkpo okwo izi ọma, ma ele Giriki, ma ele búo ele Giriki, ele nwernu akọ, ma ele nwée akọ.

¹⁵ Ke bụ nụ ọ zị m mkpa o zni anụ ele zị nụ Rom izi ọma.

Iknerema ke izi ọma

¹⁶ Iwhnerne izi ọma ka zá nọtụ m, ọ bụ rikne Chiokike dụ ọznohia kpakara ele kweru, ele Ju ke mbom, nụ ele búo ele Ju.

¹⁷ Kwnornu nụ ome mma ke Chiokike whuyaru iwhne n'izi ọma, hite n'ọkwnata ovu dụ ọkwnata ovu, lele kpa be gbarụ a n'okwukwo nsọ, “Nye mee mma jeehi nụ ọkwnata ovu a ziri bụdnụ.”

Ọnuma Chiokike megidne badnụ

¹⁸ Kwnornu nụ ovu owe ẹhni Chiokike hiri n'oligwe whuya iwhne megidne kpakara ele máa Chiokike, ele hi nụ risi rikne aruru-eli be naak-pagidne ezi ọka.

¹⁹ Chiokike neewe ẹhni megidne be, kwnornu nụ nhne be kwesiri ọ mahia gbasiri Chiokike whuyaru iwhne. Ọ bụ Chiokike n'iwhuru a gesiri be ẹhni a.

²⁰ Hite n'okike ọwa, nhne be whnú anya gbasiri Chiokike, nụ rikne a zị ọkwnukokwnu, nụ oyiyi a zị

nsọ bụ ke badnụ whnụrnu anya, be whnụrnu be nụ kpakara nhne Chiokike keru, ke bụ nụ badnụ nwée nhne o ji gọnahoru ẹhni a.

²¹ Be marnụ Chiokike, kọvu be nyéne a igwugwu kwesiri a, be tị mmamma, kọvu echiche be bụ nhne etekne, mkpọma iwahnirniwhno be jihiaru n'ọchichiri.

²² Be kaa nụ be bụ ele nwernu akoniche, be bụ ele iwahnirniwhno.

²³ Tnụnuma be jaakwanụ Chiokike ke nwụ ọnwu, be nọkpo risi ẹli nyee nhne be pniornu ọpniọ lele badnụ ke nọonwu ọnwu, nụ ọnunu, nụ anọhia nụ agwọ.

²⁴ Chiokike gweru be nyewhete n'aka nhne zila richna hite nụ ome nhne ovu ojo be pioru, be gweru ẹhni be mee nhne tị iwahnerne n'esilawuru ẹhni be.

²⁵ Be gweru aghalaghala gbanwọ ezi ọka Chiokike, be nọkpo risi ẹli nyee nhne be keru eke tnụnuma nye keru nhne n'iwhuru a, nye nwe ọznarni ọkwnukokwnu. Amim.

²⁶ Kam kpayarụ, Chiokike nyernu be n'aka ome nhne tị iwahnerne. Ele rinya gharu o mee nhne lele kpa omen'ẹli omekọrita nyerukna nụ nyerinya zi, be be neemekọrita.

²⁷ Kpam masi, ele rukna sigbasiri ọ dnanyi ele rinya, be naadnanyiataru ẹhni be. Be neeme nhne tị iwahnerne n'esilawuru be, be naata awhnụwhnu nhne ojo be mernu.

²⁸ Kpa be kwéle ọ marnụ Chiokike nụ mkpọma be, Chiokike nyewhete be n'aka ovu ruru ọru, ma be mee nhne be kwésile o mee.

²⁹ Aruru-ẹli zi ọdo nụ ọdo jihiaru mkpọma be, mmehie, ọwho-anya, okne nhne ojo, ntaknarnama

ovu, ogbu badnu, ọlu ọgwnu, aghigho, nu osno irno, ozno izno.

³⁰ Ele naakaja ẹhni be, be snornu Chiokike irno, ele sọ anya, ele noolu ọnu, ele neechehia apna ikne kpa be jeeme nhne ojo, ele zá noobnonu ele murnu be nsni,

³¹ ele nwée ọghohia, ele zá naabita ọgba-njo-ẹhni, ele nwée ovu ọma, ele zá ọodonu ele berere obirizi.

³² Be magwu nu iwu Chiokike kwuru nu ele neeme nhne ojo ka jonwu ẹnwu, ọ buo nu be neeme nhne ele ka kpọi, kovu be naadasinu ele neeme nhne ele ka n'ikwnu.

2

Ikpe zi snam ke Chiokike

¹ Ji badnu, i nwée rikne gonahoru ẹhni i, ji nye neekpe nye berere ikpe, kwnornu nu hne i zi neekpe nye berere ikpe bu hne ikpe zi naama i, kwnornu nu i neeme otu nhne wam.

² A magwu nu Chiokike neekpe ikpe zi snam nu risi ele neeme kpakara nhne ka.

³ Ji badnu etekne ke neeme nhne ke i kwno neekpe ele berere ikpe, i che nu i jaagbanahoru ikpe Chiokike sa?

⁴ Mọbu i neeledna okne ovu ọma Chiokike anya, nu onabnanya a, nu ogologo ọsnuta ovu a? N'ezi, Chiokike neemenu i nhne ọma ka ma o dubna i nu ọtuhnasna ovu.

⁵ Kovu hite nu ovu rikne nu ovu kwé obniaji i, i naabitani ẹhni i awhnuwhnu ke kakwo n'ọbochi ovu owe ẹhni Chiokike nu okpume ikpe a zi snam.

⁶ Chiokike jọkwu nye ọbula ọgwo lele kpa ọnu a jiri zi.

⁷ Ele gwuzosi rikne neeme nhne ọma, noopio igwugwu nọ ọsobisi, nọ nkọli bụdnu, Chiokike jeenye be bụdnu kwó okwo.

⁸ Kọvu, ele noopio nhne ke aka be, ele kwéle ezi ọka, ele noosno nhne ọjo, Chiokike jọowukwasi be ovu owe ẹni a nọ ọnuma a.

⁹ Okne awhnụwhnu nọ nhne igbugbu jaazinu kpakara ele neeme nhne ọjo, ke mbọm ele Ju, ma ele bụo ele Ju.

¹⁰ Kọvu igwugwu, ọsobisinu nọ udno jaazinu nye ọbula neeme nhne ọma, ke mbọm ele Ju, nọ ele bụo ele Ju.

¹¹ Kwnornu nọ Chiokike zá neele badnụ anya nọ ruwhnu.

¹² Kpakara ele mernu mmehie hne be nwée Iwu Mozizi jọonwu hne Iwu zila, ele mehieru hne Iwu zi, Iwu jeekpe be ikpe.

¹³ O bụo ele nọonu Iwu bụ ele zi snam nọ ruwhnu Chiokike, kọvu ele neeme nhne Iwu kwuru.

¹⁴ Nga ele bụo ele Ju ele nwée Iwu hiri n'ovu be mee nhne Iwu kwuru, kam bụnu be Iwu, ọ bụ n'ezi nọ be nwée Iwu.

¹⁵ Bụdnu be neegesi nọ be gbagwụ Iwu n'ovu be, ovu be naagbanụ be akebne, noobno be nhne, mọbu nọogomanu be.

¹⁶ Ka jọobu n'ọbochi Chiokike jeekpe nhne tugwaru otugwa ke badnụ ikpe, hite n'aka Karaịsi Jizọsi lele kpa izi ọma me neezni kwuru.

Ele Ju nọ Iwu

17 I noosukwu ẹhni ị nye Ju, nọtukwasi ovu n'Iwu, neeji Chiokike naanya risi.

18 Ị magwu echiche a, i nahoru nhne ke kakwo mma, kwnornu nu ị muhiaru a n'iwu.

19 Ị kwnataru ovu nu i bu nye noodu nye isni, iwhne ele zi n'ochichiri,

20 nye neezni ele iwhnirniwhno nhne, nye neezni rumu takiri nhne, nye nwegwu akoniche zuru ozu, nu ezi oka.

21 Ji nye neezni ele berere nhne, i zní ẹhni i nhne sa? I neezni o zá nye znu buznu, ji n'iwuhuru i znú buznu sa?

22 Ị kaa, “O zá nye mee oyi,” jiwa, i méé oyi sa? I snornu chi berere irno, kovu i znú buznu nu ruwhnu renwu?

23 Ji nye ji iwu Chiokike noolu onu, o bu ị zá neeme Chiokike nhne iwhnerne hite n'olulu iwu a?

24 Lele kpa be gbaru a n'okwukwo nsọ, “Ele búo ele Ju naakaja renwhna Chiokike kwnornu anu ele Ju.”

25 O buru nu ị bíta iwu, okpa nka ị bu nhne, kovu o buru nu ị bítage iwu, okpa nka ị bu nhne etekne.

26 O buru nu ele búo ele Ju be kpáge nka, bíta Iwu, be jeegweru be lele ele be kparu nka.

27 Nye be kpáge nka n'anọ-ẹhni kovu o bítaru Iwu jaama ị ikpe, ji nye nwegwu Iwu be gbaru n'okwukwo nu nye be kparu nka, kovu ị zá naabíta Iwu.

28 Badnu búo nye Ju n'anọ-ẹhni kpọi, okpa nka búo masi ke anọ-ẹhni kpọi.

29 Nye Ju n'ezi bu nye Ju n'ovu. Okpa nka bu ke be kparu n'ovu hite n'enine Chiokike, o búo n'Iwu be

gbarụ n'okwukwo. Oznarni badnụ wam híge n'aka badnụ, kọvu n'aka Chiokike.

3

Chiokike kwesiri ọ kwnata ovu

¹ Kìni bụ nhne ele Ju nwernu kakwo ele búo ele Ju? Ọ zị mbnarna zị nụ ọkpa nka?

² Owe! K'agịda n'apna ọbula. Ke mbom, Chiokike nyernu ele Ju ikwu-ọnu a.

³ Ọ bụru nụ agwna be nwée ọkwnata ovu? O jeeme Chiokike bụru nye kwésile ọ tükwasi ovu?

⁴ Óza rịa rịa! Chiokike jọburiri nye ezi ọka, ọ bụbedi nụ kpakara badnụ jọburu ele aghalaghala. Lele kpa ọkwukwo nsọ kwuru,

“Ma i gesi nụ ị bụ nye nookwu ezi ọka,
Ikpe jáama ị nga be neekpe i ikpe.”

⁵ Ọ bụru nụ a mernu nhne búo ọma, ke jeegesi ome mma Chiokike ke zị snam, kịni bụ nhne a jookwu? Nụ Chiokike mernu nhne ọjọ nụ ọ ta aị awnụwhnu nụ ovu owe ẹhni sa? (M nookwu lele badnụ etekne.)

⁶ Óza rịa rịa! Ọ bụru nụ Chiokike búo nye mee mma, ndaa kpa o jeeji kpe ọwa ikpe?

⁷ Ọ bụru nụ aghalaghala m jeenye Chiokike igwugwu hite nụ ome ezi ọka a whuya iwhne, ndaa kpa be jaama m ikpe lele nye mmehie?

⁸ Ọ bụru nụ anụ neeche kpam, anụ jaakaa, “Ngwa ma a mee nhne ọjọ ma nhne bụru ọma va”? Agwna ele badnụ nyernu m mkparị, noobno m nụ ka bụ nhne me neezni ele badnụ. Be jaama be ikpe lele kpa o kwesiri.

Nye mee mma zá

⁹ Ndaa, a ka ele búo ele Ju mma? Óza rĩa rĩa. M karu m nu ele Ju ma ele búo ele Ju n'otu zi nu mkpururu mmehie.

¹⁰ Lele kpa okwukwo nsọ kwuru,
“Ọ zá nye bú nye mee mma, ọ búbedi otu.

¹¹ Ọ zá nye nwernu akoniche,
ọ zá nye noopio Chiokike.

¹² Kpakara ele badnu dasinnu Chiokike aznu,
ọ zá iru be bnarnu,
ọ zá nye neeme nhne oma
ọ búbedi otu.

¹³ Onu be nu lele ilili gberu anya,
riro be nookwu oka aghigho,
oka ojo lele njulu agwo neehi nu mgbele-onu
be whuya.

¹⁴ Ovu onu nu okne onu ojo jiharuru be nu mkpoma.

¹⁵ Ochi be zi snarna snarna n'owusa onarna.

¹⁶ Olulu nhne nu nhne anya-mini noosno be
n'apna be.

¹⁷ Be máa apna udno.

¹⁸ Ogwnu Chiokike zá be n'anya.”

¹⁹ Kitna a magwu nu kpakara nhne Iwu kwuru
zinu ele zi nu mkpururu Iwu, ma be kpusni
kpakara onu ele badnu, ma kpakara owa bna
n'ikpe Chiokike.

²⁰ Kwnornu nu ọ zá nye mee mma n'anya
Chiokike hite nu ome nhne Iwu kwuru, kovu Iwu
neeme ele badnu mahia nu be mehieru.

*Ome mma hite
n'okwnata mkpoma*

21 Kọvu ome mma Chiokike whuyaru iwhe hne Iwu zila, o bu ezi oka nu Iwu nu ele owhnurninya naagbanu a akebne.

22 Ome mma Chiokike ka hiri n'okwnata ovu nu Jizosi Karaisi zinu kpakara ele kwehiaru, kwnornu nu okpa ike zila nu rime a rja rja.

23 Kwnornu nu kpakara ele badnu mehieru, be nwée rikne du igwugwu Chiokike.

24 Kọvu nkesi ke oru Chiokike mernu kpakara badnu buru ele ikpe mama hite n'ogbahia ai ke hi n'aka Karaisi Jizosi.

25 Chiokike nyernu a lele nkesi owhaji-eli hite n'okwnata ovu, ka bu ma Chiokike gesi ome mma a. N'ige wheru ewhe Chiokike jiri ogologo osnuta ovu lewhuru mmehie ke badnu anya.

26 O mernu kam ma o gesi ikpe a zi snam n'ige ka, ma o buru nye mee mma nga o neegweru badnu lele nye ikpe mama hite n'okwnata ovu nu Jizosi.

27 O buru kpam, ndaa hne mpako zi? O zila! Kini kpararu a? O bu nu hite n'obita nhne Iwu kwuru? Oza! Kọvu a kwnataru ovu.

28 A nookwusi a rikne nu be neegweru badnu lele nye ikpe mama hite n'okwnata ovu, o buo hite n'ernu ke Iwu.

29 Chiokike, o bu Chiokike ke ele Ju kpoi? O buo Chiokike ke ele buo ele Ju sa? Owe! O bu ya.

30 Hne o bu otu Chiokike, o jogwnu ele be kparu nka lele ele ikpe mama hite n'okwnata ovu be, nu ele be pala nka hite n'okwnata ovu be.

31 A jaaka nu ka neegesi n'Iwu bnage nu nhne hite n'okwnata ovu ka? Oza rja rja, kọvu a neeme Iwu gwuzosi rikne.

4

Okwnata ovu Ebereham

¹ Ndaa nhne a jaakaa gbasiri Ebereham nda aị? Kini bu nhne o piohiaru?

² O buru nu be hiri n'ernu Ebereham gwnusi a nu nye mee mma, o znernu anyaa risi nu ka. Kovu o nwée rikne mee oknomokno nu ruwhnu Chiokike.

³ Okwukwo nsọ kwuru kini? “Ebereham kweruru Chiokike, Chiokike gwnusinu a nu o bu nye mee mma.”

⁴ Nye be kwuru ogwo ernu a, ogwo ernu a buła nkesi, kovu nhne o rnuhiaru n'ernu.

⁵ Kovu nye rnuge ernu, ke kwnataru Chiokike, nye nógwnu ele ojo lele ele ikpe mana ovu, Chiokike ji okwnata ovu a gwnu a nye mee mma.

⁶ Ka bu nhne Devidi kwuru gbasiri nye owa oma, nye Chiokike híge n'ernu a gwnu nu nye mee mma,

⁷ “Nye owa oma bu nye Chiokike gbarunu mmehie, nye be kpusnirni aruru-eli a.

⁸ Nye owa oma bu nye Chiokike zá nógwnu mmehie a megidne a.”

⁹ Ngozi ka, o zinu ele be kparu nka kpoi sa? Óza, ma ele be kpála nka. Kwnornu nu a karu nu Ebereham kweruru Chiokike, Chiokike gwnusinu a nu o bu nye mee mma.

¹⁰ Ndaa hne nhne ka mernu? O nga be kparu a nka, su o bu nga be kpála a nka? O bu nga be kpála nka.

¹¹ Be kparu a nka ma o buru nhne elekema ke ome mma nu o kwnataru Chiokike ovu nga be kpála a nka, ma o buru nda kpakara ele kweru, ma be gwnusi be n'ele mee mma, o bu n'ezi nu be kpála be nka.

12 Ọ bụ masị nda ele be kparụ nka, ọ b́la nù be kparụ be nka kpọi, kọvu nù be noowu b́dnu ọkwnata ovu lele nda aị Ebereham wuru sù be kparụ a nka.

Mkwna Chiokike

13 Mkwna Chiokike kweru Ebereham nù avnurnu a nù be jeekehia ọwa b́o hite n'ọbita Iwu, kọvu ome mma ke hiri n'ọkwnata.

14 Ọ b́ru nù ele zị nù mkpururu Iwu jeekehia mkwna wam, ọkwnata ovu b́ nhne etekne, mkwna Chiokike kweru bnána iru.

15 Iwu neegweya ovu owe ẹhni Chiokike. Hne Iwu źla, ọ zá nye jaadna Iwu.

16 Mkwna wam hiri n'ọkwnata mkpọma. O mernu o hite n'oru gwuzoru kwem nù rime kpakara rụmu Ebereham. Ọ b́o ele zị n'Iwu kpọi, kọvu ma ele sno ọkwnata ovu Ebereham, kwnornu nù ọ b́ nda kpakara aị.

17 Lele kpa be gbarụ a n'ọkwukwo nsọ, “M mernu m jị nda agida mba.” Ọ b́ nda aị n'anya Chiokike, nye ọ kwnatarụ ovu, Chiokike ke naakpatne nye nwurnu ọnwu, nye neeme nhne źgele a whuya iwhe.

18 Nga olile anya źla a, Ebereham kwnatarụ ovu, ọ b́ru nda agida mba, lele kpa ọkwukwo nsọ kwuru, “Mkpuru i jaazi agida kpa.”

19 Ọkwnata ovu a dnáge adna, nga ọ whnurnu nù anọ-ẹhni a b́ nhne nwurnu ọnwu, hne ọ b́ otu riwhu awha, nù rẹkpa-nnwọ Sera nwurnu ọnwu.

20 Kọvu ọkwnata ovu a dnáge adna hite nù ókwe ekwe mọbu onwe mkpọma lawuru gbasiri nhne Chiokike kweru a mkwna, ọkwnata ovu a mernu o gwuzosi rikne naaznari Chiokike.

²¹ Ovu siri a rikne nụ Chiokike nwernu rikne o mezu nhne o kweru mkwna.

²² Kam kpayarụ, “Chiokike gwnụsinu a nụ ọ bụ nye mee mma.”

²³ Nụ be gwnụsiri a nụ nye mee mma, bụo nhne ke zịnu a kpọi.

²⁴ Ọ zị masịnu aị ele be jọogwnusi n'ele mee mma, ele kweru nụ nye wam mernu Jizọsi Nyenwe aị hi n'ẹnwu lizọ.

²⁵ Be nyernu a ma ọ nwụ kwnornu mmehie aị, o hiri n'ẹnwu lizọ ma Chiokike gwnụsi aị lele ele ikpe mámana.

5

Snarnịma nụ udno

¹ Kịtna, hne Chiokike gwnụrnu aị lele ele ikpe mána hite n'ọkwnata ovu, a nwernu udno nụ Chiokike hite n'aka Nyenwe aị Jizọsi Karaịsi.

² Jizọsi bụ nye a hiri n'aka a, hite n'ọkwnata ovu gwuzoru n'oru Chiokike. A nọonwudna ọnwudna nụ a nwernu olile anya nụ a jeekehia igwugwu Chiokike.

³ Ọ bụo kam kpọi, a nọonwudna nụ rime awnụwhnu, kwnornu nụ awnụwhnu neegweya ọsnuta ovu,

⁴ ọsnuta ovu neegweya agwa ọma, agwa ọma gweya olile anya.

⁵ Olile anya aị jọobu nhne etekne, kwnornu nụ Chiokike wụkwasiri aị ọwhnun'anya a n'ovu aị hite n'Enine Nsọ, ke o kesiri aị.

⁶ Kwnornu nụ nga a nwée rikne, Karaịsi nwụrnu kwnornu aị ele ojo máa Chiokike.

⁷ Ọ bụ nhne siri rikne nụ badnụ jookwno nye ọma nwụ ẹnwu. Kọvu badnụ eleghi anya jeenwe rikne kwnornu nye mee mma nwụ.

⁸ Kọvu Chiokike gesiri aị ọwhnun'anya a ke bụ nụ Karaịsi kwnornu aị nwụma kpa a zị kọriri nụ rime mmehie.

⁹ Be hiri n'ọvnarna a gwnụ aị lele ele ikpe mána, ọ jọoznohia aị n'ovu owe ẹhni Chiokike.

¹⁰ Kwnornu nụ a bụ ele irno Chiokike nụ mbọm, kọvu aị nụ Chiokike mernu udno hite n'ẹnwu Nnwọ a. Kịtna, a bụ ele enyi Chiokike, ọ jọoznohia a hite nụ bụdnụ Nnwọ a.

¹¹ Ọ búo kam kpọi, kọvu a nọonwudna ọnwudna nụ rime Chiokike hite nụ Nyenwe aị Jizọsi Karaịsi, nye mernu aị nụ Chiokike ziri n'udno.

Adam nụ Karaịsi

¹² Lele kpa mmehie hiri n'aka otu badnụ bna nụ rime ọwa, mmehie vuyarụ ẹnwu, ẹnwu wam zuru kpakara ọwa, kwnornu nụ kpakara badnụ mehieru.

¹³ Mmehie zị n'ọwa sụ be nyernu Iwu, kọvu mmehie zila ire nga Iwu zila a.

¹⁴ Ẹnwu hiteru n'Adam dụ n'ige Mozizi nẹchi kpakara badnụ, ma ele méhie lele kpa Adam mehieru. Adam bụ nye bíkala nhne Chiokike nyernu n'iwu.

Adam bụ oyiyi nye wam jaava.

¹⁵ Kọvu nkesi wam nuna lele mmehie. Kwnornu ọ bụru nụ agida badnụ nwurnu hite nụ mmehie otu badnụ, oru nụ nkesi Chiokike zị agida kakwo, ke gazuru kpakara ele badnụ hite n'oru otu nye wam bụ Jizọsi Karaịsi.

16 Nkesi Chiokike zị ichne nụ hne mmehie otu badnụ zị. Ikpe snornu otu mmehie wam ke vuyarụ ọmuma ikpe, kọvu nkesi wam sno agida mmehie ke vuyarụ ọgwunusi badnụ lele nye ikpe mámana.

17 Mmehie otu badnụ ka, Adam, mernu ẹnwu nęechi ọwa, kọvu kpakara ele nahịaru nkesi oru zị agida ke Chiokike nụ ome mma a, jeemegbu mmehie nụ ẹnwu hite nụ otu badnụ wam ke bụ Jizọsi Karaịsi.

18 Owe! Otu mmehie Adam vuyarụ ọmuma ikpe nụ risi kpakara ele badnụ, kọvu, otu ẹnwu ome mma Karaịsi mernu ele badnụ bụru ele ikpe mámana n'anya Chiokike, ke nyernu be bụdnụ.

19 Hite nụ risi rikne otu badnụ kpakara ele badnụ ghoru ele mmehie, otu aka wam masị, obno nsnị otu badnụ jeeme kpakara ele badnụ bụru ele mee mma.

20 Iwu varụ ma nhne ọjọ zị agida, kọvu hne mmehie zị agida, oru Chiokike barụ aba k'agida.

21 Hne mmehie nęechi hite n'ẹnwu, oru Chiokike nęechi hite n'ome mma ke noodubna nụ bụdnụ kwó okwo hite nụ Jizọsi Karaịsi Nyenwe aị.

6

*Nwu nụ mmehie,
zịri bụdnụ nụ Karaịsi*

1 Kịni bụ nhne a jaakaa? Ọ bụ ma a zị kọriri nụ neeme mmehie ma oru Chiokike ba ọba?

2 Óza rịa rịa! Ndaa kpa aị ele nwurnu ọnwu nụ rime mmehie jaazị kọriri bụdnụ nụ rime a?

³ Ọ bụ nụ anụ máa sa, be wụru aị mini ma aị nụ Karaịsi Jizọsi bụru otu, nụ be wụru aị mini ma aị nụ Karaịsi bụru masị otu n'ẹnwu a?

⁴ Hite nụ mini be wụru aị, be likọtaru aị nụ Karaịsi n'ẹnwu a, ma a nụ lele Karaịsi nga o hiri n'ẹnwu lizọ hite n'igwugwu ke Nda, a joowu bụdnu ikne.

⁵ Kwnornu nụ ọ bụru nụ aị nụ a bụ otu n'ẹnwu a, kpam masị, aị nụ a jọoburu otu n'olizọ n'ẹnwu a.

⁶ A magwụ nụ ẹhni ọknani aị bụ ke be kpogidnenu ya nụ Karaịsi n'olu ọgba a, ma be lulu ẹhni mmehie, ma a gharụ ọ bụru ọhi ke mmehie.

⁷ Kwnornu nga badnu nwurru, mmehie nwéma iknernema n'ẹhni a berere.

⁸ Ọ bụru a snornu Karaịsi nwụ ẹnwu, a kweru nụ a joosno a ziri bụdnu.

⁹ A magwụ nụ Chiokike mernu Karaịsi hi n'ẹnwu lizọ, ọ jọonwu kwno berere, ẹnwu nwéma ikn-ernema hne ọ zị berere.

¹⁰ Ẹnwu ọ nwurru, ọ nwurru kwnornu mmehie otu mgba, ọ zị bụdnu kịtna, ọ zinu Chiokike bụdnu.

¹¹ Kpam masị, anụ gwnụ ẹhni anụ lele ele nwurru ọnwu kwnornu mmehie, kọvu ele zị bụdnu nyee Chiokike hite nụ Karaịsi Jizọsi.

¹² Anụ kwé mmehie nẹchi anọ-ẹhni anụ, neeme anụ noobno nsni nhne ọjo anọ-ẹhni noopio.

¹³ Anụ kwéko o gweru ẹhni anụ nyee mmehie ma ọ bụru nhne ẹnu ke risi rikne. Kọvu anụ gweru ẹhni anụ nyee Chiokike, lele ele hiri n'ẹnwu bna nụ bụdnu, anụ gweru kpakara ẹhni anụ nyee ma be bụru nhne ẹnu ke nhne ọma.

¹⁴ Kwnornu nụ mmehie zá nẹchi anụ, anụ zila nụ mkpururu Iwu, kọvu nụ mkpururu oru ke

Chiokike.

Ele ọhi ke ome mma

15 Kini bu ka? A jaazi neeme mmehie kwnornu nu a za nu mkpururu Iwu, kovu mkpururu oru ke Chiokike? Oza rja rja.

16 Anu magwu nu nye anu noobno nsni nhne o nookwu, anu bu ele ọhi nye anu noobno nsni. Anu bu ọhi ke mmehie ke noodubna n'enuwu, mọbu ọhi obno nsni ke noodubna n'ome mma.

17 Kovu oznarni zinu Chiokike, kwnornu nu mọm anu bu ọhi ke mmehie, kovu anu bnornu nsni hite nu mkpoma anu bna n'ezi oka wam anu nahiaru.

18 Be dohiaru anu nu mmehie anu, ma anu buru ọhi ke ome mma.

19 M nookwu lele badnu, kwnornu nu anu za rikne. Nu mọm, anu gweru ẹni anu nyee nhne zila richna nu risi rikne o mee nhne ojo, kpam masi, anu gweru ẹni anu buru ọhi ome mma bna n'enu zi nsọ.

20 Nga anu bu ọhi ke mmehie, anu nwee igwe n'ome mma.

21 Ndaa mbnarna anu nwehiaru hite nhne kam nootu iwhnerne? Risi kpakara nhne kam, bu enwu.

22 Kovu kitna, be dohiaru anu nu rime mmehie, anu buru ele ọhi ke Chiokike, mbnarna anu jeenwehia jeeme anu ziri nsọ ke joodubna nu budnu kwó okwo.

23 Kwnornu nu ogwo ẹnu mmehie bu enwu, kovu nkesi ke Chiokike bu budnu kwó okwo hite nu Karaisi Jizosi Nyenwe ai.

7

*Nhne atụ ke ọlulu nzi
nụ nnwernerne*

¹ Rụmu nda m, m nookwunu anụ ọka lele ele magwụ Iwu, anụ magwụ nụ Iwu jigwu badnụ hne nye wam zị bụdnu.

² Nyerinya nwernu nzi zị n'iwu nga nzi a zị bụdnu, kọvu ọ bụru nzi a nwụ, ọ zịma iwu jigwu a lele nye zị nụ nzi.

³ Ka neegesi, ọ bụru nụ nzi a zị bụdnu, nyerinya wam gbọ nzi berere, be jookwu a nye neeme ọyi. Kọvu ọ bụru nụ nzi a nwurnu ọnwu, iwu jígele a, ọ bụru nụ ọ gbọru nzi berere. O méne ọyi.

⁴ Rụmu nda m, otu aka wam, bụ kpa ọ zinu anụ. Anụ nwurnu ọnwu n'Iwu hite n'ẹhni Karaịsi. Anụ bụ ke nye wam hiri n'ẹnwu lizọ, ma anụ bụru mgwna ẹrnu ke bnarnụ iru n'aka Chiokike.

⁵ Nga a zị bụdnu n'anọ-ẹhni, nhne ọjọ ke Iwu Mozizi vuyarụ bụ nhne a noosno, kpakara nhne a mernu dubnarnụ aị n'ẹnwu.

⁶ Kọvu kịtna, a nwernunem ẹhni aị n'Iwu, kwnornu nụ a agbūrulam n'iwu wam jigwu aị, a kpenu Chiokike n'apna ikne ke Enine, ọ bụo n'apna ọknani ke Iwu be gbarụ n'ọkwukwo.

Iwu nụ mmehie

⁷ Kịni bụ nhne a jookwu? Iwu wam ọ bụ mmehie sa? Ọza rịa rịa. Kọvu iwu mernu m mahịa mmehie. M znégele m amahịa nhne bụ a ọwho-anya ọ bụru n'Iwu kwúle, "I nwékọ ọwho-anya."

⁸ Kọvu mmehie hite nụ nhne be nyernu n'iwu nwehịaru oghere ọ kpakne ọwho-anya zị ichne

ichne. Kwnornu nù mmehie nwùrnu ọnwu hne iwu zịla.

⁹ M zị m bụdnu hne iwu zịla, kọvu nga nhne be nyernu n'iwu varu, mmehie ziri bụdnu nù rime m, m nwuma.

¹⁰ Nhne be nyernu n'iwu ke kwesiri o gweya bụdnu, vuyanu m ẹnwu.

¹¹ Mmehie hite nù nhne be nyernu n'iwu duwhuru m, hite nhne be nyernu n'iwu, gbu m.

¹² Iwu wam zị nsọ, nhne be nyernu n'Iwu zị masị nsọ, ọ zị kwem, ọ bụru ọma.

¹³ Ka o neegesi nù nhne bụru ọma vuyanu m ẹnwu? Óza rịa rịa. Ọ bụ mmehie ke kpayaru a. Mmehie gweruru nhne bụru ọma mee a o vuyanu m ẹnwu, ma mmehie whuya iwhne nù ọ bụ mmehie n'ezi. Hite nù nhne be nyernu n'iwu be jeegesi nù mmehie bụo ọma rịa rịa.

¹⁴ A magwu nù Iwu bụ nhne enine. Kọvu m bụ m badnu etekne, nye be reru lele ọhi ke mmehie.

¹⁵ M máam nhne me neeme, kwnornu nù nhne me noopio o mee, m nwée m rikne mee a, kọvu nhne me píole o mee, bụ nhne me neeme.

¹⁶ Nga me neeme nhne me píole o mee, ka neegesi nù Iwu wam bụru ọma.

¹⁷ Kọvu ọ bụo me neeme nhne ka, kọvu ọ bụ mmehie ke wu nù rime m.

¹⁸ M magwu m nù ọ zá nhne ọma ọbula zị nù rime m (ke bụ n'anọ-ẹhni m). Kwnornu nù ọ naamasị m o mee nhne bụru ọma, kọvu m nwée m rikne o mee a.

¹⁹ M mée m nhne ọma me pioru o mee, kọvu nhne bụo ọma me píole o mee, bụ nhne me neeme.

20 Ọ bụru nụ me mee nhne me píole o mee, ka neegesi nụ ọ búo me bụ nye neeme a, kọvu ọ bụ mmehie wam ke wu nụ rime m.

21 M magwụ m nụ iwu nọornu ẹrnu, nga me pioru o mee nhne bụru ọma, nhne ojo zị nụ ruwhnu m.

22 Nụ rime enine m, m noopio iwu Chiokike.

23 Kọvu m nọowhnu iwu berere nọornu ẹrnu nụ rime m, iwu ke nọolusi iwu ke ovu ọgwnu. O neeme m bụru ọhi iwu ke mmehie ke nọornu ẹrnu nụ anọ-ẹhni m.

24 M bụ m badnụ ke nọowhnuji anya. Nyele jọodohia m n'anọ-ẹhni ke ẹnwu ka?

25 A nọotunu Chiokike mmamma hite nụ Nyenwe aị Jizọsi Karaịsi.

Hite n'echiche m, m bụ m ọhi ke iwu ke Chiokike, kọvu, anọ-ẹhni m bụ ọhi iwu ke mmehie.

8

Budnu hite n'Enine

1 Kịtna, ọ zá ikpe naama ele zị nụ rime Karaịsi Jizọsi.*

2 Kwnornu nụ iwu ke Enine ke neegweya budnu nụ Karaịsi Jizọsi, mernu m whọga n'ọhi iwu ke mmehie nụ ẹnwu.

3 Nhne Iwu nwée rikne meli kwnornu nụ anọ-ẹhni badnụ zịla rikne, Chiokike mernu a, o ziyaru Nnwọ a lele badnụ ke mmehie ma ọ bụru ariọhna mmehie. Hite nụ ya ọ ma budnu mmehie ke badnụ ikpe.

* **8:1** Agwina ọkwukwo ọknani kwuru: ele zá noowu budnu lele kpa mmehie pioru, kọvu lele kpa enine noopio.

⁴ Chiokike mernu ka ma nhne ziri ezi ke Iwu zu ozu nū rime aị ele noowu bụdnu lele kpa Enine noopio, ọ bụo kpa anọ-ẹhni noopio.

⁵ Ele noowu bụdnu n'anọ-ẹhni neeme nhne anọ-ẹhni noopio, ele noowu bụdnu n'Enine neeme nhne Enine noopio.

⁶ Nye anọ-ẹhni nẹchi nwurnu ọnwu, kọvu nye Enine nẹchi nwernu bụdnu nū udno.

⁷ Kwnornu nū nye anọ-ẹhni nẹchi bụ nye irno Chiokike, o nwée rikne bīta iwu Chiokike, n'ezi, o jéenwe rikne bīta a.

⁸ Ele anọ-ẹhni nẹchi jéenwe rikne mee nhne jọoso Chiokike n'ọnu.

⁹ Anọ-ẹhni zá nẹchi anụ, kọvu Enine, ọ bụru nū Enine Chiokike wu nū rime anụ. Nye ọbula ke nwée Enine Karaịsi, bụo ke Karaịsi.

¹⁰ Ọ bụru nū Karaịsi zị nū rime anụ, ọ bụ n'ezi nū anọ-ẹhni anụ nwurnu ọnwu kwnornu mmehie, kọvu enine anụ zị bụdnu kwnornu ome mma.

¹¹ Ọ bụru nū Enine Chiokike ke mernu Jizọsi hi n'ẹnwu lizọ wuru nū rime anụ, nye wam ke mernu Karaịsi hi n'ẹnwu lizọ jeeme anọ-ẹhni anụ ziri bụdnu hite n'Enine a ke wu nū rime anụ.

¹² Kam kpayarụ, rụmu nda m, a jigwu ọgwo o wu bụdnu aị, ọ bụo kpa anọ-ẹhni noopio.

¹³ Kwnornu nū ọ bụru nū anụ wu lele kpa anọ-ẹhni anụ noopio, anụ jọonwu ẹnwu, kọvu ọ bụru nū anụ jeehi n'enine gbu kpakara ẹrnu ojo ke anọ-ẹhni, anụ jaazi bụdnu.

¹⁴ Kpakara ele Enine Nsọ Chiokike nẹchi bụ rụmu Chiokike.

¹⁵ Kwnornu nū Enine Chiokike nyernu anụ méne anụ ele ọhi, ke neeme anụ bụru ele ogwnu.

Kọvu Enine neeme anụ bụru rụmu Chiokike, anụ jeenwe rikne kwnakwu a, “Papa, Nda m.”

¹⁶ Enine Nso Chiokike naagbanụ enine aị akebne nụ a bụ rụmu Chiokike.

¹⁷ Ọ bụru nụ a bụ rụmu Chiokike, a bụ ele neekheja mkpe, ele neekheja mkpe Chiokike, ele be nụ Karaisi neekerikota mkpe. Ọ bụru a snornu a ta awghnụwhnu, a joosno a kehja igwugwu a masi.

Igwugwu ke zi nụ ruwhnu

¹⁸ M whnurnu m nụ awghnụwhnu ke ige ka bụ nhne a jeeji tusunu igwugwu ke be jookpumenu aị.

¹⁹ Kpakara nhne be keru eke ji olile anya siri rikne neese nga be jeegesi rụmu Chiokike.

²⁰ Kwnornu nụ nhne be keru eke ghọru nhne etekne, ọ bụo nụ rikne aka ke be, kọvu kpa Chiokike mernu be, be zi kọriri neele anya,

²¹ nụ nhne be keru eke jeenwernu ẹhni be whoga n'ẹhni oro oro, kehja igwe nụ o nwernu ẹhni zi igwugwu ke be bitannu rụmu Chiokike.

²² A magwu dụ kịtna nụ kpakara nhne be keru eke ọosnu idne lele nye rime ọmumu nnwọ neeme.

²³ Kọvu ọ bụo nhne be keru eke kpoi, ma aị masi ele nwernu Enine ke bụ nkesi mbom ke Chiokike, a ọosnu idne nụ rime ovu aị, neese nga Chiokike jeeme a bụru rụmu a, ma ọ gbahja anọ-ẹhni aị.

²⁴ Kwnornu be znohiaru aị hite n'olile anya, kọvu ọ bụru a whnụ nhne a neele anya a, ọ buma olile anya n'ezi. Ọ zá nye neele anya nhne ke ọ whnugwu anya.

²⁵ Kọvu ọ bụru a neele anya nhne a zá ọowhnu anya, a jeeji nkasi ovu neese a.

26 Kpam masị, Enine Nsọ neeyinu aị aka, ọ bụ ezi nụ a zá rikne. Kwnornu nụ a máa kpa a jeekpe okpukpe, kọvu Enine Nsọ Chiokike neekpehianu aị, hite n'osnu idne ke ọnu jóokwuli.

27 Kwnornu nụ Chiokike nye noonyosna mkpọma badnụ magwụ echiche Enine, ọ bụ Enine Nsọ nọorio aririo nụ risi ele nsọ lele kpa echiche Chiokike jiri zị.

A kakwo ele mmeri

28 A magwụ nụ Chiokike neeme kpakara nhne nọornuko ọnu ọma n'otu kwnornu ele whnurnu Chiokike n'anya, ele o sukwuru ma be mee echiche a.

29 Kwnornu nụ ele Chiokike mahiamarnu, ọ bítaru be ichne, ma be nụ lele Nnwọ a, ma Nnwọ wam bụru Ọpnarna n'esilawuru agịda rụmu nda.

30 Ele Chiokike bítaru ichne, o sukwuru be, ele o sukwuru, o mee be ele ikpe mámana, ele o mernu ikpe ele mámana, o mernu be kehia igwugwu a.

31 Ndaa nhne a jookwu nụ kpakara nhne ka? Ọ bụru nụ Chiokike dasị aị n'ikwnu, nyele jeemegidne aị?

32 Nye wam ke bítala Nnwọ a, kọvu kesi aị ya, ndaa kpa o jéenyé aị kpakara nhne?

33 Nyele jobno ele Chiokike hōhiaru nhne? Ọ bụ Chiokike bụ nye neeme ele badnụ ele ikpe mámana.

34 Nyele bụ nye naama aị ikpe? Ọ bụo Karaịsi Jizọsi, nye nwurnu ẹnwu, nye hiri n'ẹnwu lizọ, daziri n'akarikwnunga Chiokike nọorionu aị aririo.

35 Nyele jeekewa aị n'ọwhnun'anya ke Karaịsi? Ọ bụ mkpa, sọbu nhne osi rikne sa, sọbu okne

ọkpagbu, sọbu ọknunyo, sọbu ọgba-ẹto, sọbu aghom, sọbu ama-ogwnu?

³⁶ Lele kpa be gbarụ a n'ọkwukwo nsọ,
 “Kwnornu anụ, ẹnwu neech e aị aka nụ ruwhnu
 kpakara ọbochi,
 be nọopnughari aị lele atnurnu be noogbu
 ogbu.”

³⁷ Óza! A nwernu omeri nụ kpakara nhne ka hite nụ nye wam ke whnurnu aị n'anya.

³⁸ Kwnornu nụ m magwụ m nụ ẹnwu mọbu bụdnu, mọbu enine izi, mọbu rẹnwu ojo, mọbu nhne ke zị kịtna, mọbu nhne ke jaava, mọbu rikne ọbula,

³⁹ mọbu olu mọbu nhne zị nụ rime ẹli, mọbu nhne berere be keru eke, jéenwe rikne kewama aị n'ọwhnun'anya ke Chiokike ke zị nụ rime Karaịsi Jizọsi.

9

Chiokike nụ ele ke ọ họhoruru

¹ M nookwu ezi ọka nụ rime Karaịsi, ọ bụo aghalaghala, Enine Nsọ naagbanụ ovu m akebne nụ m zá m naagha aghalaghala.

² Anya-mini zị m nụ mkpọma, nhne igbugbu zị m nụ mkpọma kpakara ige.

³ Ọ jaamasị m, ọ bụru nụ Chiokike vuru m ọnu, kewama m nụ hne Karaịsi zị, kwnornu rụmu nda m, ele ẹli m,

⁴ ele Izireli. Chiokike mernu be bụru rụmu a, o okpumennu be igwugwu a, ya nụ be gbarụ njo-ẹhni, o nyernu be Iwu, be nwernu okpukpe ọma, nụ kpakara mkwna Chiokike,

⁵ be bụ avnụrnu kwu ele nda ọknani, Karaịsi hiri n'avnụrnu be va n'anọ-ẹhni. Ọznarni zīnu Chiokike ke nēechi kpakara nhne ọkwukokwnu. Amīm.

⁶ Ọ bụo nụ Chiokike mézule ikwu-ọnu a, kwnornu nụ ọ bụo kpakara ele hi n'avnụrnu Izireli bụ rụmu Izireli n'ezi.

⁷ Kpakara be bụo rụmu Ebereham n'ezi, ọ bụbedi nụ be hi n'avnụrnu Ebereham. Kwnornu nụ ọkwukwo nsọ kwuru, “Kọvu be jọgwnu rụmu ị hite n'Aziki.”

⁸ Ka bụ nụ ọ bụo rụmu be mụrnu n'anọ-ẹhni bụ rụmu Chiokike, kọvu ele be mụrnu lele kpa Chiokike kweru Ebereham nụ mkwna bụ rụmu a n'ezi.

⁹ Kwnornu nụ ka bụ nhne mkwna wam kwuru, “N'ige be karu aka, m jeehiehna, Sera jọomu nnwọ rukna.”

¹⁰ Ọ bụo ka kpọi, rụmu Ribeka nwernu otu nda, ke bụ nda ọknani aị Aziki.

¹¹ Sụ ọ mụrnu rụmu ejima rukna lawuru wam, nga be mége nhne ọma mọbu ke ojo, ma nhne Chiokike kwuru gwuzosi rikne,

¹² ọ bụo hite n'ernu kọvu kwnornu nụ o sukwu ikwu a, Chiokike kannu Ribeka, “Nye ke okno badnu jeeznenu nye ke matị izi.”

¹³ Lele kpa be gbaru a n'okwukwo nsọ, “M whnurnu m Jekopu n'anya, sno Iso irno.”

¹⁴ Ndaa nhne a jookwu? Ọ bụ nụ Chiokike bụ nye ndala sa? Óza rịa rịa.

¹⁵ Kwnornu nụ ọ kannu Mozizi,
“M jọdonu nye me jọdonu obirizi, obirizi,
mee masinu nye masiri m oru.”

16 Ka neegesi nū ọ búo hite nū nhne badnū noopio mọbu nhne be nọornu, kọvu ọ bú obirizi Chiokike.

17 Kwnornu nū ọkwukwo nsọ kannū Fero, “Ka bú nhne me kwno gwuzote i, ma m gesi m iknernema m n'ẹhni i, ma kpakara ọwa mahia rẹwhna m.”

18 Chiokike nọdonu nye masiri a obirizi, neemenu nye o pioru ma o knesni mkpọma, knesni mkpọma a.

Ikpe nū obirizi Chiokike

19 Otu badnū jaakanū m, “Ndaa kpa Chiokike naama aị ikpe? Nyele nwernu rikne o gwuzogidne echiche a?”

20 Jị badnū etekne, i bú nyele naasa Chiokike ọka? Nhne be kpuru ọkpụ ọ jaasikwa nye kpuru a aiji, “I kwno kịni kpụ m kpa?”

21 Ọ bú nye nọokpu ite o nwée rikne n'ẹhni otu ọrura wam kpụ ite lawuru, otu bna n'ernu zị okne mkpa, ke berere be ji a rnū ẹrnu kpakara ige?

22 Ọ zị Chiokike n'aka o gesi ikpe nū iknernema a, kọvu, ọ zị kwno a n'aka o gesi ogologo ọsnuta ovu n'ẹhni ele o neekpe ikpe, bú ele ọ bítaru ma ọ la be n'iyi.

23 Ọ zị masi n'aka a ọ wụkwasi ọkwnamarna igwugwu a nū bụdnū ele ọ bítannu obirizi a.

24 Kwnornu nū a bú ele o sukwuru, ọ búo hite n'avnurnu ele Ju kpọi, kọvu ma hite n'ẹli ele búo ele Ju.

25 Ka bú nhne o kwuru n'ọkwukwo Hosiya, “M jookwu be ele ke m, ele wam búo ele ke m, ele wam me whnúge n'anya, m jookwu be ele me whnurnu n'anya.

26 Ọ jọobu nụ hne be zị kaa,
nụ be búo ele ke m,
jọobu hne be jookwu be rụmu Chiokike ke zị
bụdnu.”

27 “Azaya siri okokoba gbasiri rụmu Izireli, kaa,
Ọ bú n'ezi nụ rụmu Izireli nụ lele rịzna ke ngeri
osimini,
ele be jọoznohia jaazị matị k'agịda.

28 Kwnornu nụ Jihova jeekpebi ikpe ọwa wara
wara n'ome mma.”

29 Lele kpa Azaya kwuru nụ mbom,
“Ọ búru nụ Chiokike ke Meli Nhne Dum
dónu aị obirizi ghasanụ aị agwna rụmu,
a znernu ọnu lele Sodom,
a znernu ọnu lele Gómora.”

*Ele Izireli kwéle
ọ nabnarnụ izi oma*

30 Ndaa nhne a jookwu? Ọ bú nụ ele búo ele Ju
ele zá noosno ome mma Chiokike, nwehịaru ome
mma ke hi n'ọkwnata mkpoma?

31 Kọvu ele Izireli, noosno iwu ome mma nwéé
nhne iwu ome mma karụ, be píohịala a.

32 Kịni kpayarụ ka? Kwnornu nụ be jíge ọtukwasi
ovu pio a, kọvu lele nụ ọ bú n'ẹrnu. Be dna n'olu
rugwu nọkpobi ọchi.

33 Lele kpa be gbarụ a n'ọkwukwo nsọ, kaa,
“Le, m bítaru m otu akaworugwu nụ rime Zayọni
ke jeeme ele badnụ kpọbi ọchi,
rugwu ke jeeme be dna.

Kọvu nye ọbula ke tųkwasiri a mkpoma,
be jéekwe iwhnerne tų a.”

10

¹ Rụmu nda m, nhne nọogwnu m nụ mkpọma, m neekpe masiṅu Chiokike gbasiri ele ke m bụ Izireli, bụ ma be znọhia be.

² M jaagbanu be akebne nụ be nwegwu mkpọma o kpenu Chiokike, kọvu be nwée oghohia.

³ Kwnornu nụ be máa ome mma ke Chiokike, be bete noogwuzote ome mma ke be, be bítala ẹhni be nụ mkpururu ome mma Chiokike.

⁴ Karaisi bụ mbimambi Iwu, nye ọbula ke tụtwasiri a mkpọma, jeenwehia ome mma.

Oznohia zinu kpakara badnu

⁵ Ka bụ nhne Mozizi kwuru gbasiri ome mma ke hi n'Iwu, “Nye ọbula ke bitaru Iwu jaazi budnu nụ rime be.”

⁶ Kọvu ome mma ke hiri n'ọtukwasi mkpọma karu kpa, “I kwúko nụ mkpọma i, ‘Nyele jeezne oligwe?’ (zne gwedna Karaisi).

⁷ Mọbu, ‘Nyele jeezne nụ rime ẹli?’ (zne gwelizo Karaisi n'ẹnwu).”

⁸ Kọvu ndaa nhne o kwuru? “Ikwu-ọnu wam zi i ndundu, ọ zi n'ọnu i ma n'ovu i.” Kam bụ ikwu-ọnu ọtukwasi ovu ke a nọokpo okwo.

⁹ Ọ buru nụ i jeeji ọnu i kwuhia nụ Jizosi bụ Nyenwe ai, gweru mkpọma i kweru nụ Chiokike mernu o hi n'ẹnwu lizo, be jọoznohia i.

¹⁰ Kwnornu nụ badnu ji ovu a kweru, be gwnusi a nụ nye ikpe mána, o ji ọnu a kwuhia, o nwehia ọznohia.

¹¹ Ọkwukwo nsọ kwuru kpa, “Iwhnerne zá nọotu ele kwnataru a ovu.”

12 Ọ zá nhne zị ichne hne nye Ju nụ nye búo nye Ju zị. Chiokike bú Nyenwe kpakara badnụ, nọowukwasi ngozi a nụ risi ele naakwnakwu a.

13 Kwnornu nụ be jọoznohia kpakara ele noosukwu rẹwhna Nyenwe aị.

14 Kọvu ndaa kpa be joosukwu a, ọ búru nụ be kwéle nụ ya? Ndaa kpa be jeekweru, ọ búru nụ be núná nhne gbasịri a sa? Mọbu ndaa kpa be jọonu, hne ọ zá nye nọokpo okwo izi ọma?

15 Ndaa kpa be jọokpo okwo hne ọ zá nye zizn-ernu be? Lele kpa be gbarụ a n'ọkwukwo nsọ, kaa, “Le kpa ọchi be marnụ mma bú ele neezni izi ọma.”

16 Kọvu, ọ búo kpakara be kweru izi ọma wam, kwnornu nụ Azaya karụ, “Nyenwe aị, nyele kweru izi a ziri?”

17 Ka neegesi nụ ọkwnata mkpọma jeehi nụ ọnurnu izi ọma va, ọnurnu jeehi n'ọkpo okwo izi ọma Karaịsi.

18 Kọvu m nẹsikwa, ọ bú ezi nụ be núná izi ọma wam? Be nurnu a. Lele kpa ọkwukwo nsọ kwuru, “Nkọli be gazuru kpakara ọwa, ikwu-ọnu be duru hne ọwa sọturu.”

19 M nẹsikwa kwno, ọ bú nụ ele Izireli máa? Mozizi n'íwhuru a beru ọsno kaa, “M jeeji ele mba ọ zá nhne be bú mee anụ nwe anya-kwu, m jeeji mba ke nwée akoniche kpasu anụ iwe.”

20 Azaya kwusiri a rikne kaa, “Ele zá noopio m, piohàru m, m mernu m ele zá nẹsikwa ajiji gbasịri m whnụ m anya.”

21 Ka bú nhne o kwuru gbasịri Izireli,

“Kpakara ọbochi, m gbasarụ m aka m lawuru o kwubnanya ele risi rikne nụ ele zá noobno nsni.”

11

Chiokike ghásala ele ke a

¹ M sịkwa kwno, ọ bụ nụ Chiokike ghasarụ ele ke a sa? Óza! Ma n'iwhuru m bụ nye Izireli, ke avnuru Ebereham, eriri ruwho Benjamini.

² Chiokike ghásala ele ke a ọ mañamarnu nụ mbom. Anụ magwu nhne okwukwo nsọ kwuru nụ hne Elaija naariasno Chiokike megidne Izireli,

³ “Nyenwe aị, be gburu ele ọwhnurninya i, be kwnadna ojo ariohna i, me nụ nsunu m gwnarnu, be noopio o gbu m.”

⁴ Kini bụ nhne Chiokike kannu a? “M bitannu m ẹhni m pokwu ele rukna ẹsau, ele kponna Balị risi ẹli.”

⁵ Kpam masi, n'ige ka, Chiokike, hite n'oru a hohiaru ele ke gwnarnu.

⁶ Kwnornu nụ ọ bụ oru a, ọ buo n'enu, ọ buru nụ ọ bụ hite n'enu, oru bu ma oru.

⁷ Kini kwno? Ele Izireli piohiala nhne be noopio, kovu ele wam ọ hohiaru piohiaru a, ovu kporu ele berere bekwnu.

⁸ Lele kpa be gbaru n'okwukwo nsọ, kaa, “Chiokike nyernu be enine iwhnirniwhno be nwernu anya, kovu be whnu osno, be nwernu nsni, kovu be nu nhne, du tna.”

⁹ Devidi karu, “Iriri be gho mbita nụ nhne joogbu be, be dna n'olu a, ta awnuruwhnu.

10 Isni kpu be, be whnú ọsno,
 ivu rinya nyigbu be ọkwnukokwnu.”

Ọznohia ele búo ele Ju

11 M nẹesikwa, ele Izireli be dnarnu ma be la n'iyi sa? Óza ría ría. Kwnornu nu mmehie be, ele búo ele Ju nwehiaru ọznohia, ke jeeme ele Izireli nwe anya-kwu.

12 Ọ búru nu mmehie be mernu kpakara ọwa nwe ngozi, be dnarnu mboni ma ele búo ele Ju nwehia ngozi, kpakara ọwa jeenwe agida ngozi nga be jeekweru nu Karaísi.

13 M nookwunu anu oka kitna ele búo ele Ju. Hne me bu nye izi ele búo ele Ju, m jeeji ẹnu m kpa nganga.

14 Nyele ma, m nwernu rikne mee ele ẹli m nwe anya-kwu, ma m nwernu m rikne znọhia agwna be.

15 Kwnornu nu nga Chiokike ghasaru be, kpakara ọwa nu Chiokike mernu udno. Kini jeeme nga Chiokike jookwubnanya be? Ọ jobu nu ele nwurnu onwu jaazi budnu.

16 Ọ búru nu mpekele bredi mbom be nyernu Chiokike zi nsọ, kpakara ke gwnarnu zi nsọ. Ọ búru nu ẹwnugwnu isisi zi nsọ, kpakara nkala a zi masi nsọ.

17 Ọ búru nu be o gbukwahalaru agwna nkala olivu, be gweru anu bu nkala olivu ohia nyakwnusi a, anu neeri nhne oma ke hi n'isisi olivu wam.

18 Anu menu nkala wam oknomokno, chenwanya nu o búo anu vu ẹwnugwnu, kovu ẹwnugwnu vugwu anu.

19 Kọvu kwu kpa, “Be gbukwahalaru nkala isisi gweru ai nyakwnusi.”

20 Owe! Be gbukwahalaru be kwnornu nu be kwé ekwe, kọvu, anu gwuzo kwnornu nu anu tukwasiri ovu. Anu vúlizo ẹhni anu olu, tnunuma, anu tu ogwnu.

21 Kwnornu nu o buru nu Chiokike gharu o ta nkala isisi olivu ke ruhjaru awnwhnu, o jaagharu o ta anu awnwhnu.

22 Le mkpoma oma nu nhne rikne ke Chiokike, nu o mesiri ele dnarnu adna rikne, kọvu o donu anu obirizi, o buru nu anu jaadazigidne nu mkpoma oma a. O buru nu anu jaadazigidne nu mkpoma a, o joogbukwahala anu.

23 O buru nu ele Ju jeehi n'ókwe ekwe be whuya, Chiokike jaanyakwnusi be berere, kwnornu nu Chiokike nwernu rikne o nyakwnusi be.

24 Anu bu nkala isisi olivu ohia, ke Chiokike nyakwnusiri n'ehni isisi olivu be znurnu oznu, lele kpa o kwésile. O buru nu Chiokike mernu kpa, anu mahia nu o nwernu rikne nyakwnuhnasi nkala isisi olivu be znurnu oznu n'ehni isisi olivu kam be zi.

Obirizi Chiokike zihu kpakara badnu

25 Rumu nda m, o nwernu nhne omimi me noo-pio anu mahia, ma anu gharu eche nu anu bu ele ako n'anya anu. Nhne omimi kam bu nu risi rikne rumu Izireli jaazi okwnukokwnu. Kọvu o jaazi tem onu ogwnugwnu ele buo ele Ju ele jaavakwnusi Chiokike zute.

26 Kpam masi, be jooznohia kpakara ele Izireli, lele kpa be gbaru a n'okwukwo nsọ,

“Nye Ọznohia jeehi nụ Zayọni va,
o joovume kpakara mmehie rụmu Jekọpu.

27 Me nụ be jaagba njo-ẹhni,
nga me vumernu mmehie be.”

28 Ele Ju bụ ele irno izi ọma. Ka bụ mbnarna ke anụ ele bụo ele Ju. Kọvu be bụ ele ọ họhiaru, whnụ be n'anya kwnornu ele nda be ọknani.

29 Chiokike zá naagbanwo echiche a n'ẹhni ele ọ họhiaru, gọzi masị.

30 Hne anụ ele bụo ele Ju zị, anụ bnóge Chiokike nsni nụ mbom, kọvu kịtna, anụ nwernu obirizi Chiokike kwnornu ele Ju ele bnóge nsni.

31 Kpam masị, anụ nwehịaru obirizi Chiokike mernu ele Ju bnóge Chiokike nsni ma be nwehịa masị obirizi Chiokike.

32 Kwnornu nụ Chiokike mernu kpakara ele badnụ bụru ele risi rikne ma be nwehịa obirizi a.

Ọznarni zịnu Chiokike

33 A! Le kpa ẹkwnu nụ akoniche nụ nhne ọmuma Chiokike hna omimi.

Kpa a nwée rikne nyosna a echiche a,
badnụ nwée rikne piohiali apna a.

34 “Nyele magwụ mkpọma Nyenwe aị?
Nyele nwernu rikne zni a ezni?”

35 “Nyele nyeleru Chiokike nhne,
ma Chiokike kwụ a ọgwo?”

36 Ya keru kpakara nhne, kpakara nhne ke zị bụ ke a, ya nwe kpakara nhne.

Ọznarni zịnu a ọkwukokwnu. Amim.

12

Budnu nye ẹnu Chiokike

1 Rumu nda m, kam kpayarụ, m ji m obirizi Chiokike naariasno anụ, anụ gweru ẹhni anụ yisi n'aka Chiokike lele ariohna zị bụdnu, zị nsọ, ke nọoso Chiokike n'ọnu, bụ ke anụ kwannụ Chiokike n'ezi.

2 Anụ nuko lele ele ọwa ka, kovu Chiokike gbanwo echiche anụ ma ọ ziri ikne ikne, ma anụ mahia nhne bụ echiche Chiokike, echiche ọma a, ke nọoso a n'ọnu, ke zuru ozu.

3 Kwnornu nụ oru Chiokike nyernu m, me kanụ anụ, ọ zá nye vulizọ ẹhni a olu n'oriri a karụ kpa o kwesiri, kovu anya dno anụ nụ risi n'okpe ẹhni anụ ikpe. Anụ gweru ọkwnata ovu Chiokike tussinnu anụ kpe ẹhni anụ ikpe.

4 Lele kpa a nwernu agida nhne ke zị ẹhni, ke ọbula nwernu ẹnu ke a.

5 Kpam masi, ọ bụ n'ezi nụ a zị agida, a bụ otu nụ rime Karaisi, be knekotaru aị n'otu lele nhne zị ọdo nụ ọdo n'otu anọ-ẹhni.

6 Nye ọbula nwernu nkesi ke a lele kpa oru Chiokike nyernu a. Ọ bụru nụ nkesi otu badnụ bụ whnụ ọwhnurninya, nye wam gweru ọtukwasi ovu mee a.

7 Ọ bụru nụ nkesi a bụ o zne izi, o zne a, ọ bụru o zni nhne, o zni nhne.

8 Ọ bụru ọ gba ele badnụ inwe, o mee kpam. Nye neekesi ele berere nhne, o mee a nụ mkpoma ọma, nye noodu ele badnụ, ọ rnusi ẹnu a rikne. Nye nọodo obirizi, o gweru mkpoma ọma mee a.

Iznizni gbasiru

Ọwhnun'anya

9 Ọwhnun'anya kwesiri ọ zị snam. Anụ sno nhne ojo irno, anụ knekwaru nhne ọma aka rikne.

10 Anụ gweru ọwhnun'anya rụmu nda whnụ ibne anụ n'anya nụ rime Karaisi, anụ sọbisinu ibne anụ karu ẹhni anụ.

11 Anụ bụo ele ime mgwu, anụ rnusi ẹrnu rikne, anụ gweru mkpoma zi snam neeznenu Nyenwe aị izi.

12 Anụ nwudna n'olile anya, anụ snuta mkpoma nụ rime okpagbu, neekpe okpukpe kpakara ige.

13 Anụ nụ ele nwée nhne kerita ẹkwnu anụ, anụ lekota ele izne.

14 Anụ nọgozi ele naakpagbu anụ, anụ nọgozi, anụ vuko be onu.

15 Anụ snornu ele nọonwudna onwudna, nwudnahoru, anụ snornu ele naagba mkpe, gba mkpe.

16 Nhne gbasiri ele berere metu anụ nụ mkpoma. Anụ buko ele oknomokno, anụ snornu ele ovu duru ẹli meko nhne. Anụ bụo ele akọ n'anya anụ.

17 Anụ jiko nhne ojo kwu nye mernu anụ nhne ojo ogwo. Anụ mee nhne buru oma n'anya ele badnu.

18 Anụ nụ kpakara ele badnu ziri n'udno, o buru nụ o kwe omume, kpa anụ nwernu rikne.

19 Ele me whnurnu n'anya, anụ megwnarnu, kovu gharu onuma Chiokike rnu ẹrnu a, kwnornu nụ okwukwo nsọ kwuru, nụ Nyenwe aị kwuru, “Mawa nwe mmegwnahia, m jeemegwnarnu.”

20 Kovu lele nhne okwukwo nsọ kwuru,
 “O buru nụ wiri nọogwnu nye irno i, nyee a wiri,
 o buru nụ akpiri nọokpo a ẹkwnu, kwute a
 mini, o nwornu,
 kpam, i naaghakwasị esekere ẹkwnu n'olu risi a.”

21 Anụ kwé nhne ojo megbu anụ, kọvu anụ gweru nhne ọma megbu nhne ojo.

13

Mkpururu ele ọchichi

¹ Nye ọbula b́ta ẹhni a nụ mkpururu ọchichi, kwnornu nụ ọ źa ele nẹchi ọchichi ke Chiokike b́tala, Chiokike b́taru kpakara ele nẹchi ọchichi.

² Nye ọbula ke neemegidne ọchichi neemegidne nhne Chiokike b́taru, nye mernu kpam jeegweyanụ ẹhni a ikpe.

³ Ele neeme nhne ọma źa nọotu ogwnu ele ọchichi, kọvu ele neeme nhne ojo jọotu ogwnu. I pioru ogwnu ele nẹchi ẹchi gharụ ọ tų ị? Mee nhne b́ru ọma, be jaaznarnị ị.

⁴ Kwnornu nụ ọ b́ nwo izi Chiokike neeme nhne ọma. Kọvu ọ b́ru nụ ị mee nhne ojo, ogwnu a tų ị, kwnornu nụ o v́le ama-ogwnu a etekne. Ọ b́ nwo izi Chiokike, neemegwnahianu a ovu owe ẹhni a n'ẹhni ele neeme nhne ojo.

⁵ Kam kpayarụ, i jọobno nsni ele ọchichi, ọ b́o kwnornu nụ ovu owe ẹhni Chiokike kpọi, kọvu kwnornu nụ mkpọma ị.

⁶ Ke b́ anụ jọotu ntụ-ẹli, kwnornu nụ ele ọchichi b́ rụmu izi Chiokike nọornu ẹrnu źnu be, ele ji kpakara ige be nẹchi ọchichi.

⁷ Anụ kwụ ogwo anụ ji be, tų ntụ-ẹli ọ b́ru anụ ji ogwo ntụ-ẹli, tų ntụ ahia ọ b́ru nụ anụ ji ogwo ntụ ahia, sọ nye kwesiri anya, bisinu nye kwesiri.

Whnụ ibne anụ n'anya

⁸ Anụ jí nye ọbula ọgwo, kọvu anụ whnụrita ẹhni anụ n'anya. Nye ọbula ke nọowhnu badnụ ibne a n'anya mezuru Iwu.

⁹ Iwu wam, “I mékọ ọyi, i gbúko badnụ, i znúko buznu, i nwéko ọwho-anya.” Ka nụ kpakara iwu berere jikọgwu aka n'otu iwu ka, “Whnụ nye agbatibi i n'anya lele ẹhni i.”

¹⁰ Nye ọbula ke whnụrnu nye agbatibi a n'anya jéeme a nhne ojo. Ọwhnun'anya bụ o mezu kpakara Iwu.

¹¹ Anụ mee kpa, anụ magwụ nhne ige ka bụ. Ka bụ ige anụ jeetnanya n'anyarna, kwnornu nụ ọznohia aị zị ndundu kịtna karụ nga a kweru nụ mbom.

¹² Chi jiminem, chi ọbubo zị masị ndundu, a gharu ẹrnu ọchichiri, woru mgwna ọgwnu ke iwhne.

¹³ Ngwa ma a kpa agwa lele ele zị n'iwhne ke ọbochi, ọ búo ele okne iriri nụ ele ẹra manya naagba, ọ búo nụ nhne rune nụ nhne tụ iwhnerne, ọ búo ọlu ọgwnu, nụ anya-kwu.

¹⁴ Kọvu anụ woru Nyenwe aị Jizọsi Karaịsi lele iwo, anụ nyée anọ-ẹhni anụ oghere o mee nhne ojo ke nọogwnu a.

14

Anụ kpé rụmu nda anụ ikpe

¹ Anụ kwubnanya nye zá rikne nụ ọkwnata ovu, kọvu anụ nụ a dógbuta kwnornu nhne o kweru.

² Ọkwnata ovu otu badnụ kweru a, o ri kpakara nhne, kọvu nye berere, ọkwnata ovu a zá rikne, neeri ọkwukwo ọhia kpọi.

³ Nye ke neeri kpakara nhne lédna nye zá neeri anya, nye zá neeri kpakara nhne kpé nye neeri kpakara nhne ikpe kwnornu nù Chiokike nakweruru a.

⁴ Í bú nyele ke neekpe ọhi nye berere ikpe? Ọ bú nyenwe a jaakaa ma ọ mekwahịaru mọbu o mékwahịala. O jeemekwahịa, kwnornu nù Nyenwe aị jeeme a o gwuzoru kwem.

⁵ Otu badnù kanù otu ọbochi zị mkpa k'agịda n'esilawuru ọbochi berere, nye berere jaakaa nù kpakara ọbochi bú otu. Echiche nye ọbula jì a ruwho.

⁶ Nye karù nù otu ọbochi zị mkpa k'agịda neeme a nọsobisinu Nyenwe aị, nye neeri nhne ọbula nọsobisinu Nyenwe aị, kwnornu nù ọ nọtunu Chiokike mmamma nù wiri wam. Nye zá neeri agwna nhne nọsobisinu Nyenwe aị, nọtunu Chiokike mmamma.

⁷ Ọ zá nye zịnu ẹhni a bụdnu kpọi, ọ zá nye nọonwunu ẹhni a ẹnwu.

⁸ Ọ bụru nù a zị bụdnu, a zịnu Nyenwe aị bụdnu, a nwurnu ẹnwu, a nwunu Nyenwe aị, ma a zị bụdnu ma a nwurnu ọnwu, a bú ke Nyenwe aị.

⁹ Kwnornu nù Karaisi nwurnu, hi n'ẹnwu lizo ma ọ bụru Nyenwe ele zị bụdnu nù ele nwurnu ọnwu.

¹⁰ Jịwa, i kwno kịni neekpe nnwọ nda ị ikpe? I kwno kịni neeledna nnwọ nda ị anya? Kpakara aị joogwuzo nù ruwhnu ngadna ikpe Chiokike.

¹¹ Lele kpa be gbarù a n'ọkwukwo nsọ,
 “Nyenwe aị kwuru kpa, ‘Kpa me zị bụdnu
 kpakara mpnerne ọchi joogbunu m n'ẹli,
 kpakara riro jookwupịya nù mawa bú
 Chiokike.’”

12 Kpakara aị n'otu n'otu jaakahia nhne a mernu nụ ruwhnu Chiokike.

13 A gharu o kpe ẹhni aị ikpe, tnunuma, ị bíta nhne jọokpo nnwo nda ị ọchi, mọbu nhne jeeme ọ dna.

14 M magwu m nụ hite nụ mmekorita ke me nụ Nyenwe aị Jizosi, ọ zá nhne ke zila richna, ọ buru nụ badnu kaa nụ otu wiri zila richna, ọ zila richna hne ọ zi.

15 Ọ buru nụ nhne i riri jeemekasi nnwo nda ị ẹhni, ị zá neezne izne n'owhnun'anya. I kwéko nhne i riri lulu nye Karaịsi kwnornu nwu ẹnwu.

16 I kwéko be kaa nụ nhne ọma ị bu nhne ojo.

17 Kwnornu nụ ẹli-eze Chiokike buo nhne oriri nụ ọnwunwo, kovu ọ bu ome mma, udno nụ snarnima nụ rime Enine Nso.

18 Kwnornu nụ nye neeznenu Karaịsi izi kpa neeme nhne nọso Chiokike n'onu ma nụ ruwhnu ele badnu.

19 Ngwa ma a neeme nhne jeegweya udno, nụ ke joowuli aị olu lele ọro.

20 I kwnó wiri lulu ẹrnu aka Chiokike. Kpakara wiri zi richna, kovu ọ buo ọma o ri nhne jeeme badnu dna.

21 Ọ buru ọma ị gharu o ri wiri, mọbu nwọ manya, mọbu mee nhne ọbula ke jeeme nnwo nda ị dna.

22 Kpakara nhne i kweru nụ rime nhne ele ka, dazinum ji nụ Chiokike. Nye ikpe máge nụ nhne o kweru bu nye ọwa ọma.

23 Kovu ọ buru nụ mkpoma badnu marnu a ikpe nụ nhne o riri, Chiokike jaama a ikpe ma o ri a, kwnornu nụ ọ kwnátala mkpoma nụ nhne o neeme. Nhne ọbula ke híge n'okwnata mkpoma bu mmehie.

15

Mee nhne j̄oso ele berere

n'̄onu

¹ Aì ele zì rikne n̄ ọkwnata mkp̄oma kwesiri o vuru ekperi ele zá rikne. Ọ búo neeme nhne n̄oso aì n'̄onu.

² Nye ọbula menu badn̄u ibne a nhne búru ọma, ke j̄oso a n'̄onu, ma o wuliz̄o a olu lele ọro.

³ Kwnornu n̄u Karaìsi méne nhne j̄oso ẹhni a n'̄onu, lele kpa be gbar̄u a n'̄okwukwo ns̄o, “Nhne iwhnerne ele naakpas̄i ì iwhnerne dnakwas̄iri m.”

⁴ Kpakara nhne be gbar̄u n'̄okwukwo ns̄o n'̄o bochi wheru ewhe z̄inu aì, neezni aì nhne, ma a nwernu olile anya hite n'̄ndidi n̄u ọgba inwe ke ọkwukwo ns̄o nyernu aì.

⁵ Chiokike ke neenye ndidi n̄u ọgba inwe mee an̄u nwernu enine ọziri n'otu kpa an̄u noosno Karaìsi Jiz̄osi,

⁶ ma kpakara an̄u n'otu jeegweru otu ọnu znarn̄i Chiokike n̄u Nda Nyenwe aì Jiz̄osi Karaìsi.

⁷ An̄u kwubnanya ibne an̄u lele kpa Karaìsi kwubnanyarn̄u an̄u ma an̄u znarn̄i Chiokike.

⁸ M naakan̄u n̄u Karaìsi gh̄oru nnw̄o izi ele Ju ma o gesi ezi ọka Chiokike, mezu mkwna o kweru nda be ọknani,

⁹ ma ele búo ele Ju nyee Chiokike igwugwu kwnornu obirizi a, lele kpa be gbar̄u a n'̄okwukwo ns̄o,

“Ka búo nhne me kwno znarn̄i ì n'esilaw̄uru ele búo ele Ju,

m j̄ogwnunu r̄ewhna ì eri.”

¹⁰ Ọ kaa, berere,

“Anụ snornu rụmu Chiokike nwụdna, anụ ele bụo ele Ju.”

11 O kaa, berere,

“Anụ ja Nyenwe aị, kpakara ele bụo ele Ju,
kpakara ele badnụ gwnụnu a eri ọznarni.”

12 Berere kwno, Azaya karụ,

“Otu Badnụ jeehi n'ẹbnurnu Jesi va,
o jeelizo chị kpakara mbam,
ele bụo ele Ju jeelekwasị a anya.”

13 Kịtna, Chiokike ke olile anya gweru ovu ọso nụ udno mejite ọkwnata mkpoma anụ nụ rime a, ma olile anya anụ nooso oso hite nụ rikne Enine Nso.

Pọlu nye izi ele bụo ele Ju

14 Rụmu nda m, m magwụ m nụ nhne ọma zị nụ mkpoma anụ. Anụ magwụ kpakara nhne ka nkari nkari, ke jeeme anụ nwernu rikne neeznitaru ẹhni anụ nhne.

15 M ji m anya siri rikne gbanụ anụ ọkwukwo, ma anụ chenwanya agwna nhne, kwnornu nụ oru Chiokike nyernu m.

16 Chiokike mernu m nye izi Karaịsi Jizọsi, nye nọornunu ele bụo ele Ju ẹnu, nye naakwa ariọhna, nọokpo okwo izi ọma Chiokike, ma ele bụo ele Ju bụru nhne ariọhna Chiokike jeegweru, ke Enine Nso bítaru nsọ.

17 Kam kpayarụ, m ji m ẹnu m naanya risi nụ rime Karaịsi Jizọsi nhne gbasiri Chiokike.

18 M jóokwu nhne berere karụ nhne Karaịsi mernu hite n'aka m, o duru ele bụo ele Ju be bụru ele noobnonu Chiokike nsni hite n'ikwu-ọnu m nụ ẹnu m.

19 Hite nụ rikne nhne ọgba akebne nụ ọnu ndu-ẹhni ke Enine Chiokike hite nụ Jeruselem du Ilirikom, m nọokpo okwo izi ọma gbasiri Karaisi n'apna zuru ozu.

20 Ọ bụ nhne zị nụ mkpọma m o zni izi ọma hne be nuna nhne gbasiri Karaisi, ma m gharu m o wu ọro n'olu ntụ-ẹli ọro nye berere.

21 Lele kpa be gbaru a n'okwukwo nsọ,
“Ele be kanna be nhne gbasiri a jowhnurnu,
ele nuna nhne gbasiri a joghohia.”

22 Kam kpayaru, be kwéle me vakwnusi anu.

Polu marnu mmuma
o zne Rom

23 Kọvu kịtna, ọ zá nhne me jọornu nụ kpakara ẹli ka, ọ nọogwnu m ọ whnu anu anya agida awha ka.

24 M jeeme kpam kịtna, m jowhnu anu kpa me neezne Sipeni. Anu jeeyinu m aka n'izne m, ma me nụ anu dazikwole ige matị.

25 Kọvu kịtna, m neezne Jeruselem kwnornu ele ke Chiokike zị pị.

26 Kwnornu nụ ọ masiri ọgbako Chiokike ke zị nụ Masidonia nụ Akaya o gweya nhne be jeekesi ele mboni zị n'esilawuru rumu Chiokike ke zị nụ Jeruselem.

27 Ọ masiri be o yinu be aka, kọvu ezi ọka zị a bụ ka, ọ bụ ọnu zinu be o yinu ele mboni wam aka, kwnornu nụ ele Ju nụ ele bụo ele Ju neekerita ngọzi ke enine, ele bụo ele Ju kwesiri o kesi ele Ju ngọzi ke ẹkwnu be.

28 Nga me rnukparu ọnu ka, nyega be nhne be tuiaru, m jowhnu anu nga me neezne Sipeni.

²⁹ M magwụ m nụ nga me jaava, m jeeji agịda ngọzi Karaịsi va.

³⁰ M naariasno anụ, rụmu nda m, hite nụ Nyenwe aị Jizọsi Karaịsi nụ ọwhnun'anya ke Enine Nso, anụ snornu m kpesi okpukpe rikne nụ ruwhnu Chiokike kwnornu nhne me nọowhnu.

³¹ Anụ kpe okpukpe ma be dọhia m n'aka ele kwé ekwe zị nụ Judiya, ma ele Chiokike zị nụ Jeruselem nabnarnụ ọrnu m n'esilawuru be,

³² ma hite n'echiche Chiokike, m jeeji snarni ma vakwnusi anụ, ma me nụ anụ dazirikota nụ mkpọma ọma.

³³ Chiokike ke udno dazinu kpakara anụ. Amim.

16

Obekwu ikwu Pọlu

¹ M neegesi anụ nwene aị rinya Febi, ke nọornunu ọgbako Chiokike ke zị nụ Kęnkiria ọrnu.

² Anụ bikno nabnanya a nụ rẹwhna Nyenwe aị lele kpa rụmu Chiokike kwesiri, anụ yisinu a aka nụ nhne ọbula zị mkpa, kwnornu nụ ọ bụ nye ovu ọma neeyinu agịda ele berere aka ma me masi.

³ Anụ bekwu Prisila nụ Akwila, ele ọrnu ibne m, ele me nụ be sno nọornunu Karaịsi Jizọsi ọrnu.

⁴ Be gweru bụdnu be bita nụ nhne oze bụdnu nụ risi m, m nọotnu be mmamma, ọ bụo me nụ nsnunu m kpọi, kọvu kpakara ọgbako Chiokike zị n'eli ele bụo ele Ju nọotu masinu be mmamma.

⁵ Anụ bekwu ọgbako Chiokike zị n'oro be. Anụ bekwu enyi m me whnurnu n'anya Epenetusi, nye mbom ke hi n'Esia kweru nụ Karaịsi.

⁶ Anụ bekwu Meri nye rnunu anụ agịda ọrnu.

⁷ Anụ bekwu Andorōnikusi nụ Junias, ele Ju ibne m me nụ be zị n'ikelu, be bụ ele badnụ marnụ nkari nkari n'esilawuru ele izi, be beru m osno mahia Karaịsi.

⁸ Anụ bekwu Ampilatusi, nye me whnuru n'anya nụ rime Nyenwe aị.

⁹ Anụ bekwu Uribanusi nye ernalu ibne aị n'ernalu Karaịsi, nụ Sitakisi enyi oma m.

¹⁰ Anụ bekwu Apelesi nye be kparuru iru, o whe nụ Karaịsi.

Anụ bekwu ezi-nu-oro Arisitobulosi.

¹¹ Anụ bekwu Erodiōni nye Ju ibne m. Anụ bekwu ele ezi-nu-oro Nakisosi, ele zị nụ rime Nyenwe aị.

¹² Anụ bekwu Terifena nụ Terifosa ele ernalu nụ rime Nyenwe aị, nụ nye me whnuru n'anya bụ Pesisu nye ernalu nụ rime Nyenwe aị.

¹³ Anụ bekwu Rufosi, nye ernalu Nyenwe aị hohiaru. Anụ bekwu nne a, nye bụ masi nne m.

¹⁴ Anụ bekwu Asikiritosi, Filegoni, Hemisi, Patirobasi, Hemasi nụ kpakara rumu nda anụ nụ be zị.

¹⁵ Anụ bekwu Filologosi nụ Julia, nụ Nerusi nụ nwene a rinya, nụ Olimpasi nụ kpakara rumu Chiokike be nụ be zị.

¹⁶ Anụ gweru obekwu ikwu nsọ ke rumu nda bekwurita ehi anụ. Kpakara ogbako Chiokike neebekwu anụ.

Ezni ipne-aznu Pulu

¹⁷ Rumu nda m, anụ bikno, anya du anụ eli gbasiri ele neegweya okewa nụ naakpahie okwnata ovu ele badnụ anya, ele neezni nhne ke neemegidne iznizni anụ nahiaru. Anụ neeze be.

¹⁸ Kwnornu nụ ele nụ kpam zá nọornunu Karaịsi ẹrnu, kọvu rụwho be. Hite n'ọnu biri biri be nụ ọka sọ n'ọnu, be nooduwihu ele zị snam nụ mkpọma.

¹⁹ Kpakara ọhna nurnu obno nsni anụ, ke mernu mkpọma sọ m n'ọnu k'agida kwnornu anụ. Kọvu m pioru m anụ buru ele nwernu akoniche hne nhne ọma zị, ele ikpe mána hne nhne ojo zị.

²⁰ N'ige matị Chiokike ke udno jọozogbu Ek-wensu nụ mkpururu ọchi anụ. Oru ke Nyenwe aị Jizọsi dazinu anụ.

²¹ Timoti nye ẹrnu ibne m neebekwu anụ, ya nụ Lusọsi, nụ Jasoni nụ Sọsipata ele Ju ibne m.

²² Mawa, Tetiọsi, nye gbarụ ọkwukwo ka neebekwu anụ nụ rime Nyenwe aị.

²³ Gayọsi nye me zị n'oro a, nye ọgbako Chiokike zị n'oro a, neebekwu anụ. Ọchi-ịwai ọhna bụ Erasitosi nụ nwene aị rukna Kwatusi neebekwu anụ. [

²⁴ Oru ke Nyenwe aị Jizọsi Karaịsi dazinu kpakara anụ. Amim.]

²⁵ Ọznarni zinu Chiokike nye nwernu rikne mee anụ gwuzoru lele kpa izi ọma me neezni kwuru, nụ ọkpo okwo Jizọsi Karaịsi, lele kpa okpume nhne gwnarnụ agwna ke zị omimi ogologo ige wheru ewhe.

²⁶ Kọvu be kpumernu a hite nụ nhne ele ọwhnurninya gbarụ n'ọkwukwo hite n'iwu Chiokike zị ọkwukokwunu. O mernu kpakara mbam mahia, ma be kweru bnonu a nsni.

²⁷ Ọznarni zinu Chiokike nye nụ nsunu a bụ nye akọ hite nụ Jizọsi Karaịsi ọkwukokwunu. Amim.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89